

SECONDA PARTE  
POESIE POLITICHE

## ALL'AMMINISTRAZIONI DI BUSETU PALIZZOLU

Ora nun sugnu cchiù ministraturi  
nè sinnacu e nemmenu cunziggheri;  
era di contribuutu purtaturi  
pi lu nostru cumuni finu a eri  
cu granni sacrificiu e suruti.  
E quantu voti viniri a l'aperi  
chi portu ancora tributi a fauri  
finu a quannu sugnu ancora mperi.

Assissura, sinnacu, cunziggheri  
arraccumannu beni amministrari,  
vi pregu nun mancarci di doveri  
tutti li cittadini rispittari  
e tra vuiatri essiri sinceri  
senza nganni e senza liticari.  
Unitamenti forti e battaggheri  
la nostra navi sempri triunfari.

Quannu si metti ntimpesta lu mari  
li marinara senza scuraggiri,  
bisogna di sapiri navicari  
navi, cupaggiu, nu nav'appiriri.  
Lu cuntribuutu lu Statu virsari  
ma ncerca l'assissuri ci'avagghiri.  
Sapitivi pi bbeni cumpurtari  
scusati chiddu chi vi vogghiu diri.

Ci sunnu li prugetti di siguiru  
attenti quali sunnu li primuri,  
di sti prugetti nun fari scariri  
picchi sù grossi sti mali fiuri.  
Li cittadini chi vi vennu a diri  
facitini sti cosi pi favuri,  
comu cunfurtalli, at'assapiri,  
di versamenti cancianu culuri.

Amministrari sunnu cosi duri  
quantu staculi c'è di supirari,  
scusati s'aiu fattu troppi arruri  
ma stati attenti comu cumannari.  
Certu vuatri nni siti sicuri  
e certamenti ci sapiti fari,  
bon lavoru mpiegati, assissuri  
sinnacu e cunziggheri triunfari...

Amministrari ci voli manera,  
di la DC sù sempri li cchiù ntisi,  
l'amministrazioni cchiù sincera  
fatta di paisani cchiù precisi.  
Speru chi nun c'è cchiù vuci stranera,  
nè di Salemi e mancu Bavarisi  
e stu cumuni purtari bannera  
di frunti tutti l'autri paisi.

Evviva tu Busetu Palizzolu  
cumprisu Bruca, Tanci cu Blantanu  
e cu fa parti di lu nostru rolu  
Battagghia, Batia e Luzzianu.  
Evviva puru ddu fertili solu  
di Chianu Nivi, Busetu Supranu.  
Quannu dicu Busetu mi cunzolu  
mi dispiaci chi sugnu luntanu.

## MASTRU MARIU COSI TINTI E BONI

Avemù Mastru Mariu turbatu  
pi l'acqua tinta di Passu Casali,  
l'analisi ci resi risurtatu  
dunn'essiri putabili, fà mali;  
duna la curpa ch'è l'assissuratu  
e tutta la giunta comunali;  
cu vivi ss'acqua nni cari malatu,  
Palazzolu v'ascoppa a lu spitali.

Mali di Cuvernu e di fascista  
e avutri partiti manifesta,  
sù la ruvina li sintacalista  
ca sciupirari ci pari nna festa;  
nè dimucrazia nè cumunista  
contru di tutti facemu prutesta  
sulu Cuvernu di socialista  
pi subbitu carmari sta timpesta.

Testa c'un voli ntendiri e capiri  
e nun c'è forma chi si pirsuari;  
contru di la D.C., ma di nfuddiri  
mancu nni voli sèntiri parrari.  
Cu sta dimocrazia sav'affiniri  
picchi nun sù capaci cuvirnari  
e pi tri uri ci sintia diri  
di cennu a cchiù prestu di canciari.

Macari chi l'avissimu supranu,  
lu nostru diputatu Di Martinu,  
avissimu Cuvernu giustu e sanu  
nun ci fussi cchiù Pincu Pallinu  
lu prezzu rigulassi di lu granu  
la crisi la livassi di lu vinu;  
pi divintari Busetu Milanu  
aviss'amministrari Pilligrinu.

Nun pigghia sonnu, si susi matinu  
e smaniannu sempri fora tonu  
nna vota divotu a Musulinu  
ora sicialista cancia sonu;  
ma chi nni fici di lu tissirinu,  
cu ci lu ritirà lu Papa Nonu?  
Appena l'allarza Di Martinu  
ora Armiranti unn'è cchiù bonu.

È donu d'accussi pulitanti,  
attacca prestu sennu cu la genti,  
si lu sintiti quant'esti mpittanti  
avi nna spata ch'è veru tagghenti;  
dicennu nun putemu ir'avanti  
bisogna di canciari prestamenti  
arrancannu di ver'allarmanti  
chi p'affruntallu lianu li renti.

Nenti di malu, ti dumannu scusi,  
mi dispiaci siddu chi t'uffisi,  
a li partiti fai tanti accusi  
però nun tutti essiri precisi;  
li cosi sunnu veru dulurusi  
tutti li nazioni sunnu ncrisi  
tutta l'umanità stannu cunfusi,  
mi capisci o chi semu mali ntisi?

Accussi sempri lu nostru paisi  
chi giusti nun quilibria li cosi,  
nta quali nazioni sunnu misi  
li cosi cchiù mportanti e maistosi  
sunnu li russi o puru li francisi  
chi stannu frischi megghiu di li rosi  
si mi capisci nun pigghiaru mprisi,  
dòrmici di ncapu e cciarriposi.

C'è così boni, c'è puru li guai  
ma la curpanza semu sempri nui  
chi la criazioni si lu sai  
avi difetti c'un si leva cchiui;  
di cui è lu megghiu c'avi beni assai  
di un trisoru nni vulissi dui;  
si difittamu tutti, chi cc'iabbai?  
Lu munnu, cu l'addrizza, dimmi cui?

Nui furnari li così precisi  
ma sti cuntrolli cu l'aviss'affari?  
Nascemu tutti di novi misi  
tutti avemu vucca pi manciati.  
Mi po' capiri, nun ti parru ngrisi,  
lu meli nni piaci d'ammuccari  
picchè si tu ci'avissi manu misi  
chiffa'ccischiassi d'ammugghiari.

Comu di fatti pi propacantari  
l'aspettu di ssu latu lu favuri,  
c'esti lu scopu, nunn'abbabbaiari,  
e dicci ch'è cchiù megghiu ssu culuri;  
diversamenti chi nn'avvissi a fari  
pi nienti fari tutti sti sururi  
ti cumminissi megghiu nun partari  
e nò iri facennu sti rancuri.

Nun ci nni sunnu partiti sicuri  
chistu cchiù megghiu tinemuci firi,  
nni ntrissamu, facemu favuri  
e pigghiamu pi fissa, chi t'à ddiri?  
C'è nta lu munnu tanti punti scuri  
c'è leggi sulu chiddu chi ci viri  
e nni trovamu tutti nta la rruri  
caru Fotali, cerca di capiri.

Diri vulissi li tempi passati  
chi ora nun sunnu cchiù ricanusciuti,  
zzappari sempri e mali guvornati  
manciati favi, sinapi vugghiuti;  
mai si vitti li scoddi spicati,  
eranu di la fami distruruti  
li poviri murianu ntanati  
morti di fami, di friddu ngridduti.

Ora lu Statu versa cunttribbuti  
pi li spitali e pi li siminati,  
l'assegni famigliari sù duvuti  
anzi di cchiui pi la famigghiati;  
la pinzioni pi li surdi-muti  
si penza puru pi disoccupati  
e tanti beneficii attinuti:  
diversi così sunnu migghiurati.

Li vicchiareddi sù pinziunati,  
li veramenti poviri fineru,  
sacchi di pani vannu ittati  
nta li munnizzi fannu lu qualeru.  
Mi lu ricordu li tempi passati,  
la fami c'arrivava sutta zeru;  
chissi li veru tempi dispirati  
di tannu e d'ora paraddisu veru.

Ma nno pi chissu ti parru sinceru,  
ti dicu quali sù li così storti,  
stu turrurismu ch'è ghiuntu n'imperu  
e c'è cu li pruteggi e li fa forti;  
sti arti criminali chi surgeru  
chissi sù li mannanti di la morti;  
sempri dilitti cu stu russu e neru  
tu celu comu vivi li supporti.

Repubblica chi stidda chi ti porti,  
sempri cu la politica t'assetti,  
veni accusata cu ddi versi torti  
la dittatura puru cu difetti.  
Munnu picchè nun duni li cunforti,  
voli l'umanità li cosi retti,  
dici lu munnu chi curpamu forti  
e mai sunnu li cosi pirfetti.

S'aspetti chi finiscinu li vai  
unni risurta ned'ora nè poi,  
criscinu sempri, nun mancanu mai  
cantamu sempri comu fa lu groi.  
Carissimu Fodali, ma chi fai?  
Avanti, lu partitu nunt'annoi,  
scusa tantu s'aiu parratu assai,  
è pulitica sporca, cosa voi.

Vò rittu nazzioni chi canciaru  
mi lu vò diri cosa cunchiureru,  
l'arabi cu Sdraeli s'ammazzaru  
Olanda nordu n'atru cimiteru,  
la Grecia cu li turchi si urtaru,  
Messicu, Cili quantu nni mureru  
tuttu lu munnu iuntu fucularu  
è l'era chi li popoli nfudderu.

## A LI DIPUTATI

Si veramenti diputati siti,  
tutta sta viulenza liminati  
o vi cummeni megghiu fari liti  
pi ministeri, pi l'assissurati,  
e cchiù ancora iuncinu partiti  
li facci pi davveru vi grattati  
a la dimucrazia la trariti  
nun dicu tutti, certi diputati.

Tutti sti russi, nivuri bricati  
cu sti partiti si vennu a criari,  
li tempi dimucratici passati  
nun c'era tutti sti banchi arrubbari  
mancu sequestru nè genti ammazzati  
quannu da sula potti guvirnari;  
ora c'appatriari vi scurnati  
la nazioni sta pi tramuntari.

Allura si putissi riturnari  
e tutti dimucratici sinceri,  
a la dittatura unn'arrivari  
la libirtà difenniri doveri,  
la giuventù putissi riparari  
s'a ppunti giusti mettinu pinzeri;  
ma si vannu puru a sciddicari  
ca ccà ristamu mmenzu li crateri.

Succeri d'aviri gravi lutti  
èssici puru migghiara di morti  
ma prima ca ci fussi cosi brutti  
e di pinzari ntempu stari accorti;  
la bedda libirtà bona pi tutti  
mentri ch'è mmanu tinemula forti  
avanti chi ci sù li ricchi rutti  
o nostru Statu, damu bona sorti.

La bona sorti chi s'intendi diri  
è chidda ch'è difficili di fari;  
prima di tuttu s'avissi a capiri  
chi la cuscenza s'avissi a usari  
la via storta di lassalla iri  
di troppa libirtà nunn'abusari  
e tutti sti partiti di finiri  
fannu ruvini pi lu duminari.

E tutta l'Europa cuncurdari  
dari lavoru e tutti d'un culuri  
la Tomica pi l'armi nucliari  
maccanizzarli pi l'agriculturi;  
tutti li terri ncolti cultivari  
p'aviri li risorsi cchiù maggiuri  
e prima chi succeri riparari  
contru la fami ni l'affamaturi.

Ncrimintari di cchiù l'agricurturi,  
l'intustrii lu grezzu nun mancarì,  
tutti li Stati lu stessu culuri  
nun penza n'atru Statu suffucari;  
bisogna tutti essiri a fauri  
pi la crisi putiri supirari  
e forti di curreggiari st'erruri  
ma fussi fini di lu sciupirari.

Alluntanari lu lupu affamatu  
chi presenta beddu senza nvitu  
lu buscivismu sempri l'à pinzatu  
duminari a tutti no' cuntritu  
e mira l'Europa a lu sò latu  
poi di passari all'atru ritu  
nun c'è guirrigghi né corpi di Statu  
si nun c'è ntrichi di chissu partitu.

Lu buscivismu chi è sempri accanitu  
cu li minzogni ti voli mmrugghiari  
lu riccu mancia l'arrustu, bullitu  
e tu cu la cipudda t'accurdari;  
a ssu carogna mettilu nto spitu  
dacci di ncoddu, portalu a sfardari  
tu criri chi ssu stranu agguirritu  
vuliri a ttia rializzari.

Cu li tò forzi voli conquistari  
e ti sturia cu sò ciriveddu  
cerca di l'Europa duminari  
pò chiama a l'america a dueddu  
quannu la guerra veni a scatinari;  
tutti ci ngaghiamu a lu maceddu  
a ssu puntu ti voli strapurtari  
e ti trascina cu lu ngannareddu.

Lu buscivismu cu faci e marteddu  
astutu, murritusu, furbacchiuni  
lu cumprimissu storicu ch'è beddu  
la veru chiavi di lu sò purtuni;  
voli lu meli nta lu sò fasceddu  
e tu nun viri quant'è marpiuni  
comu ti nchiuri nta lu sò canceddu  
è troppu tardu quannu ti nnadduni.

Vurpuni malu calatu s'accusta,  
spera la giuventù chi la cunquista  
ma sutta ddi ranfazzi di lausta  
cecu ti la fa vèniri la vista;  
la sardatura comu fa la crusta  
ti metti capizzuna cu capista  
e tannu ti cumanna cu lá frusta  
finiu la libirtà, ora ti pista.

Comunista chi sì talianu  
tiri l'acqua ann'avutru mulinu  
aiuti chidda Russia ch'è luntanu  
trarisci la tò patria ch'è vicinu;  
e scavanu lu puzzu li tò manu  
ma poi l'acqua è di mastru Iachinu  
sirpeggia sempri quarchi casu stranu  
munnu chi di traggeri sì chinu.

Chinu ca dirivillu mi cunfunnu  
di quantu marpiuna chi ci stannu  
e testi vasti puru ci nni sunnu  
il caddi nta li manu un sì nni fannu;  
piaci ca li donni gira ntunnu  
diversi giuvinotti chissu sannu  
natura chi facisti di stu munnu  
precisamenti nna rota di ngannu.

Parrannu puru Cammara e Sinatu  
e di nna poco di parramintari,  
sempri discursi, pocu risurtatu  
un si fa atru sempri d'aggiurnari;  
currenti, spaccatura d'ogni latu  
di custruiri, puru sdirrupari  
ma la campana chi nunn'à sunatu  
mi dispiaci saviss'à ssunari.

La giuventù sapitivi vardari  
minazza puru ch'è l'inquinamentu  
'nquinata timusfera, terra e mari  
ma cu lu pigghia stu pruvvidimentu  
tutta l'umanità pò stirminari  
quannu si tratta d'avvilinamentu  
certu chi si finisci di campari  
si nazioni nun fannu l'interventu.

Scusati si difettu di talentu  
ora d'ottant'anni giustu appuntu  
li viu li ruvini e mi lamentu  
di li dilitti nun si teni cuntù;  
la giuvintù di bonu sintimentu  
pinzati dunnì semu, quali puntu  
e pi la giuvintù st'avvirtimentu  
jò sugnu vecchìu, lu mè tempu juntu.



## LU STATU FA LA GUERRA CU LU STATU

Lu Statu fa la guerra cu lu Statu  
virsannu di lu sangu un cuntributu,  
cu è c'ammazza, si veni arristatu,  
a pocu iorna pigghia lu fuiutu;  
ma puru chi vinissi prucissatu  
fussi a l'appellu prisciortu assolutu  
e l'assassinu veni libiratu  
cu essiri pruvatu e canusciutu.

Nclutu li magistrati, roba mista,  
unn'è la sucità tutta nna pasta:  
c'è nivuri, bianchi e comunista  
tutti chiantati nta la stessa rasta.  
Ognunu teni forti la sò lista  
e l'unu contru l'atru si cuntrasta.  
Quarcunu puru nta li camurrista  
cunsarisi nun pò si nun si vasta.

Basta governu e li Capi Partiti  
chi pi lu portafogghiu liticati  
nto Parlamento, cosa chunchiuriti?  
Sulu d'abortu e llochis parrati  
mentri li iorna, cu morti e firiti,  
dannu amarizzi pi li dammaggiati.  
Si l'accordu puliticu un faciti  
morinu ancora nuccenti ammazzati.

Bisogna prestu misuri adiguati  
chista è nna cosa chi nun si trascura,  
tutti li jorna bummi e attintati  
lu cittadinu mori di paura  
s'aspetta chi stu focu l'astutati.  
Chistu è cutugnu chi nun si matura  
l'Italia di luttu guvirnati  
grazii a criminali e traritura.

Si va a li urni cu la menti scura,  
si vota senza scegghiri la lista  
tutti su boni li cantitatura:  
vutamuli tutti, chidda e chista.  
Ora chi sunnu tutti a manciatura  
squilibriu, rutturi e turrurista  
e tutti nni chiancemu la svintura  
e puru lu Statu paga la sò lista.

A vista c'è trabucchi e trabuccuna  
cu dinunzi, scannali a munzeddi;  
senza rimorsu volanu miliuna  
ognunu si nni tira cuddureddi  
assartannu cu forti muzzicuna  
ca si nni vennu ossa, carni e peddi.  
Ci pari chi nissunu si nnadduna  
però raperu l'occhi l'attareddi.

Ribbeddu fannu tutti p'attrappari  
e sempri pi la cutra fannu liti.  
Cu la quartara si la pò granfiari  
nun modda si lu funnu nun viriti  
e poi tocca all'asinu pacari  
li debbiti e li danni chi faciti.  
Cu è lu reu nun si fa pigghiari  
dicennu c'avi manu assai puliti.

Siti cu sta pulitica fitenti  
di nun putiri cchiù cuntinuari  
cu tira a livanti e cu a punenti  
nun c'è cchiù cosa chi v'ammigghiurari.  
Bisogna sti partiti diffirenti  
dui li scerti surtantu vutari,  
sulu cu sta pinzata unitamenti  
putissimu l'Italia sarvari.

Mettiri disciplina di trimari  
puru chi fussi contru lu vuliri,  
pronta l'Atorità fussi a sparari  
lu tintu canusciutu chi si viri.  
Inveci l'assassinu pò ammazzari  
si v'ngalera, lu fannu sballiri  
la guardia c'ammazza av'appagari  
darrè li sbarri, cosa di nfuddiri.

Nenti pirdunu, nè difisa aviri  
cu avi li micirii pruvati,  
nveci li cosi l'annu a stabbiliri  
pi comu ci piaci all'avvucati.  
Li magistrati finta d'un capiri  
mentri annu li cani ncatinati  
furti, siquestri, unni vannu a finiri  
lu sannu difinsura e magistrati.

Lu dicu puru a certi dibbutati  
cu la mania d'ammuccia e pari,  
diversi ci nni sù cu li piccati  
puru pi cu l'avissi a giudicari.  
E si lu nfermu c'è, nun vi sarvati,  
aviti tanti peni di scuttari  
e si li raggi fussiru passati  
puchiddu ci nni fussi di scartari.

Lu turrurista sempri aumintari  
picchè si viri la rètina lenta,  
dici cu è capaci a supirari  
puru la forza chi si cci presenta.  
S'avantanu di fari spavintari  
e nta lu stessu tempu viulenta.  
Nun tantu turrurista t'avantari:  
lu focu forti cinniri addiventa.

Attenta turrurista chi pinzai:  
ammazza li genti a tri e a dui,  
siquestra ndustriali e ricchi assai,  
pagannu riscattu un si torna cchiui.  
Ma comu vi mittiti nta sti guai,  
cu vi pruteggi?, dicitimi cui...  
Dissiru: ora vò sapiri assai,  
cu nni pruteggi, lu sapemu nui.

## SCANTALU LLOCHIS (Loockeed)

Doppu currutti pò vi nfamiati  
scannalu mparlamentu raggiunari  
almenu stati zitti, nun parrati!,  
vi pari giustu chi v'atanfangari?  
Su forsi accusi o la viritati  
la pubblica nni penza d'accusari.  
Ma nzumma, cu stu versu guvirnati?,  
mi pari chi nun c'è dunn'arrivari.

Quanti cosi avissi di cuntari,  
lu sordu cu la carta, tanti trucchi  
ma tutti nun li pozzu pricisari...  
và trova soccu c'è nta ssi trabucchi.  
La stampa cerca sempri d'intacari,  
narrari si cci sunnu autri sbucchi,  
lu populu lu sentu sbarbuttari  
v'attuppa soccu dicinu ssi vucchi.

Nta trucchi e sciarri nascinu partiti,  
iri a governu bona ci firria,  
la curpa è puru nostra, lu sapiti,  
c'avemu datu troppa largasia;  
lu nnummaru si persi a quantu siti  
si persi la cuscenza pi la via  
arcuni dubitari chi faciti  
picchè traruta fu Dimucrazia.

Tu veru granni, Italia mia,  
puru cu dda banneru culurata  
onesta nun ci nn'era comu a ttia  
e di tutti li popoli apprizzata;  
ora è scumparsa dda gran simpatia,  
pirdisti l'onuri e maltrattata  
omini e donni nta la mala via  
picchè ncinocchiu è sta terra onurata.

Varca senza timuni disastrata  
mmezzu li unni, dunnì va lu ventu;  
dimmi: di cu pò essiri sarvata,  
è forsi di li Russi stu ntirventu?,  
o puru di la nivura bricata  
siminannu la morti e lu spaventu?  
E si di chissi veni guvirnata  
s'arresta nta la morsa e lu turmentu.

Prisentu chi ssi veru sfurtunata  
a lu governu c'è contru di tia,  
pari chi fannu bedda l'affacciata  
e sunnu contru la Dimocrazia.  
Cu cchiù forti la tira la pitrata  
è sempri chiddu chi ti facciulia.  
M'arrennu e dicu: ssi manciuniata  
vistuta a luttu sta Patria mia!

Sù ghiunti li patati troppu stritti  
pi li marvagi nun liari curti,  
di ribillari nni semu custritti  
chi fini nun si viri pi sti lutti.  
Semu tuttu lu populu scunfitti,  
c'è testi vasti cu mala cunnutti  
e sicutannu ancora sti dilitti  
l'Italia diventa Beirutti.

Sù tanti cani a la tò massaria  
chi t'annu scarvacatu di la sedda,  
quannu lu seri cavuru fumia  
la frotta di li cani si ribedda;  
lu cani mastro li renti nzirria  
chi tuccata nun voli la tinedda,  
li cchiù canazzi la tini ntunnia  
finu c'un ci nn'è cchiù nna stizzanedda.

Nta mala varca senza vela e prua  
fusti mbarcata Italia mia,  
v`a contru la timpesta cu ssa fua  
tanti nuccenti morinu pi` tia.  
Oh populu, la curpa `e` tutta tua  
degni nun semu di dimocrazia.  
Chi malu... versu dici lu pueta  
pigghiannu di la « a » fina la zeta.

## VIULENZA E MALI COSI

Viulenza tiri sempri nnavanti  
semu arrivati a li distritti punti:  
bummi, siquestri, dilitti, bricanti,  
picciotti scannalusi senza affrunti,  
donni drucati, omini attrettanti,  
furti, ruvini, nun ci sunnu spunti.  
Giuvini muderni e cuvirnanti  
ma lu capemu dunni semu iunti?

Cu li voti a governu foru assunti  
tanti partiti chi ssu diffirenti,  
lu populu ci desimu l'appunti  
pi cuvirnari pacificamenti.  
Guerra a lu Statu cu tanti difunti  
e chissi foru li migghioramenti.  
C'è cu fà liti pi li torna cunti  
e pi l'affritti li bumbardamenti.

Sti genti criminali chi surgeru  
pari chi su di dintra sti rapporti;  
governu, maggiuranza sia veru,  
distruggiti a chissi cuvi forti.  
Nzumma, comu si svorgi stu misteru  
e qual'è d'Italia la sò sorti?  
Genti sempri vestisi di nivuru  
e ncimiteru carriari morti?

## L'ONOREVOLE RISPUNNI

Sorti ci sunnu tutti sti partiti  
la curpa è vostra quannu chi vutati,  
cu sti culura strani e agguirriti  
semu crapi e cavuli ammiscati.  
Li lupa cu li pecuri mittiti  
e vuliti li cosi migghiurati?  
Quannu tiniti mmanu li matiti  
pinzati megghiu dunnì li ntrunzati.

## LU PUETA

Sunnu li vutanti ammaraggiati  
pi li prummisi chi a tutti faciti,  
la giacca e li masciddi ciallisciati  
nta lu mumentu chi bisognu aviti;  
ma poi la prummisa vi scurdati  
e li fissa ngagghiamu nta la riti.  
A jri a dari li voti sbagghiati  
cu fa cchiù nganni nni ci cunnuciti.

Siti un partitu chi nautru assarta  
nuddu la voli la bona cunsurta,  
vali la cosa storta chidda sarta  
di modu chi la giusta nun risurta.  
Lu buscivismu joca la sò carta  
lu malu versu c'a diversi urta,  
aspetta lu mumentu quant'assarta  
la tagghia longa pi purtalla curta.

Tutti sti brigati chi scuaru,  
sunnu allargati pi lu munnu nteru  
quanti nuccenti iuncinu a lu scaru  
su macillati ntò mircatu neru.  
Tutti li jorna si senti lu sparù  
juncinu morti p'ogni cimìteru,  
si nun penza Diu pi stu riparu  
semu a la fini di lu munnu nteru.

Diu di l'universu e d'ogni mperu  
scunciuralu pi sempri st'uracanu,  
quanti prissuni nni lu Papa eru  
tutti a pricari nta lu Vaticanu.  
E vulennu lu beni cchiù sinceru  
lu Santu Patri, isannu la sò manu  
dissi: priamu cu firi pibberu  
chi Diu sarva lu geniri umanu.

Luntanu semu di firi e cuscenza,  
versu lu focu lu populu avanza,  
spenninu miliardi ogni putenza  
pi fabbricari armi d'impurtanza.  
Armi micidiali fa la scenza  
li missili c'arriva a l'untanza,  
struri l'umanità l'intelligenza  
e va ffinisci d'essiri gnuranza.

Avanza l'incuscenza cu primura  
e ogni statu li armi si prepara,  
grossi carr'armati e cu silura  
a fari bummi tinti fannu a gara.  
Di lu macellu umanu è ghiunta l'ura  
sunc'è manu divina chi ripara  
e pò finiri cu la sciritura  
comu li tunni dintra la tunnara.

Amara vita china di piccati,  
chi ogni nazzioni morti e liti,  
bummi a niutroni preparati  
in Russia, Cina e Stati Uniti.  
E si sti armi pi bberu li usati  
tutta l'umanità la distruriti.  
Capi di nazioni e scenziati:  
sù chissi cosi giusti chi faciti?

Tutti sti miliardi chi spinniti  
pi fari beni mancu ci pinzati:  
e li populi gurissiru arricchiti  
si sti spisi pi benessiri usati.  
Nveci si parra d'armi e di liti,  
corpi di Statu, nuccenti ammazzati.  
Tutti li scinziati riuniti  
pi struriri lu munnu sturiati.

Munnu di viulenza e di piccati  
curpa la natura, nun si discuti,  
chini di difetti ci à criati  
ed era megghiu sunn'ramu vinuti.  
La curpa è puru comu cumannati,  
li populi sù mali diriggiuti  
e sù l'urtimi seculi arrivati  
ca tutti li spiranzi sù pirduti.

Ascuta Diu, tu, di l'universu  
sarva l'umanità di stu fracassu  
all'assassinu facci lu prucessu  
comu Cainu pi lu munnu sparsu.  
Li scenziati di lu malu versu  
facci capiri di canciari passu,  
sarva lu munnu cu vivu ntiressu  
prima chi di la scenza veni arsu.



## LU DISCURSU DI PERTINI

Lu ntisi nta la radiu parlari  
lu prisirenti ch'è Santru Pertini,  
tutta l'umanità raccumannari  
pi li turrurista darici fini;  
cuvannu stragi e poi dammaggiari  
matrici furasteri di ruvini.  
Prea la giuvintù d'alluntanari  
a sti pirsuni di mali camini.

Pertini dici nta l'avvirtimenti:  
Italiani puru li distanti,  
nunn'ascuta mai di st'aggenti  
chi fussi la cchiù cosa ntrissanti,

sarvati cu lu mpegnu di cuscenti  
sta nazioni ch'è piriculanti;  
di tutti li populi dipenti  
paci e libirtà tirari avanti.

Pertini lu sò cori parpitanti  
nni dissi li piriculi prisenti:  
si scoppia la guerra stirminanti  
scumpari globbu cu tutta la genti.  
Diu, lu munnu tò di temp'avanti  
ora si distruri nteramenti,  
pricamu Diu, senza e cuvirnanti  
di criari la paci e guerra nenti.

Viva lu nostru bonu prisirenti,  
chi nazioni n'è giratu tanti  
pi beni e pi giustizia nzistenti.  
Di tutti li piriculi ncuranti  
capu di Statu davveru cuscenti  
omu d'onuri di veru custanti.  
L'italiani ti mannanu baci  
Pertini chi ti batti pi la paci.

## ATTINTATU A PAPA GIOVANNI PAOLO II

Lu Papa chi lu turcu ci sparau  
campau pi miraculu di Diu;  
puru firitu a morti lu circau  
pi vidiri nta ll'occhi a chiddu riu  
e cu la firi prestu l'abbrazzau;  
lu Papa nterra e in ogni locu Diu  
vasa la manu a cu ti la tagghiau  
tocca l'arma di cui ti scunfiggiu.

## BURSCIVISMU

A burscivismu nun tinemu firi  
ca dintra la tunnara sù li ferì,  
chi nni pruteggi nni fannu capiri  
ammenti semu li sò stuia peri.  
Cu lavuri furzati pi muriri  
cumannanu a bacchetta li guirrerì;  
e ss'arivamu nta lu so putiri  
annu li vuiaredda di cunzeri.

## LI MISSILI DI LA RUSSIA

La Russia cu missili puntati  
di contru l'Europa uccidintali,  
li comunista nun sunnu scantati  
ssi cosi pi niatri sù rigali,  
si ffussiru pa Russia stallati  
sunnun cusazzi tinti e fannu mali,  
perciò l'amiricani sù accusati  
li Russi sù l'amici curdiali.

## L'API DINTRA LU FASCEDDU

L'api mastri sunnu junti assai  
nta lu fasceddu un capinu cchiui,  
tra d'iddi sunnu fra cuntrasti e guai  
pi cumannari chi e nun sannu cui.  
Fari l'accordu nun penzanu mai  
ognuna voli chi l'otra sfui,  
sciàmanu tutti, viriti c'addizzu,  
lassannu lu fasceddu spasciatizzu.

La stessa cosa tutti sti partiti:  
ammuttuna, spaccatura e liti,  
mentri lu Statu ntra lu conza e sconza  
ci spuntanu prufitti e dilinquenza.

## DILITTU ALDU MORU

Omini chi lu Statu guvirnati  
nun vi manca curtura e sapienza,  
quannu mparlamentu raggiunati  
mittitivi d'accordu cu prurenza;  
livati tutti li difficultati  
cu granni sintimentu e cu pacenza.  
Dda supra duminari nun pinzati  
chi nnasci turrurista e viulenza.

Cu tutta la curtura cumpatenza  
nni ci truvamu nta sta brutta via,  
ci fù cu nni l'avutu la cuscenza  
Moru finiu cu st'amacoggia.  
E lu pueta stì cosi li penza  
sta gran crudilità, sta tirannia;  
Moru, l'avisti a morti la sintenza  
dopu cinquanta jorna d'agunia.

Giuda, la cuncura e cumpagnia  
in via Fani annu assassinatu,  
Moru poi avisti la giuria.  
Pi quali accusa fusti massacratu,  
cu sù li rispunsabili di tia,  
nun veni lu curpevoli arristatu?  
Cu tantu tempu di la pigiunia  
li circatura nun t'annu truvatu.

Moru quantu fusti sfurtunatu,  
nuddu ti truvasti a li bisogni  
anzi barbaramente crivillatu.  
Sti cosi pi lu Statu sù virgogni  
tanti ministri s'annu ntrissatu  
circannu virità puru nt'i fogni.  
Però lu fattu mi pari mbrugghiatu  
tanti sù l'inganni e li minzogni.

Virgogni pi lu Statu e tanti guai  
stu turrurismu c'un finisci cchiui,  
Diu penza tu, pruvviri, fai  
pi st'assassini chi sunnu cu nnui.  
C'è puru manu di luntanu assai,  
finanzia, fà corpu e si nni sfui  
scura caverna c'un si trova mai  
e l'abitanti nun si sannu cui.

## NIMICI DI LU CRUCIFISSU

Cu sti nimici di lu Crucifissu  
ogni malannu v`a sempri cchiù grossu,  
poviru talianu chi tu stissu  
cu li tò manu scavi lu tò fossu  
e ora nni truvamu nta l'abissu  
nta li currenti di lu mari mossu.  
Cu sti partiti chi scuvanu spissu  
su comu deci cani supra un'ossu.



## PI LI MINISTERI

Pi ministeri c'è l'ammutta ammutta,  
mmiatu cu cci ncascia cchiù pirfetta.  
Fari ministri gratisi ciabbutta  
e nuddu ci la lassa la giacchetta.  
Tutti vannu circannu nta dda rutta  
a ccu ci veni megghiu la quasetta.  
E vi lu dicu tutta nta nna botta:  
a mannara si va pi la ricotta.

## MANU LONGHI

Diversi sannu stenniri la manu  
pi sbacantari lu casciumi chinu,  
poi tanti denunzii e baccanu  
ma nuddu sapi nenti di buttinu.  
Sannu cusuzzi di stu munnu stranu  
gira di stu versu lu mulinu:  
cu teni stritta nna retina mmanu  
la fa di saristanu e di parrinu.

## PIAZZA FUNTANA

Piazza Funtana lu cori assuttigghi,  
ogni pirsuna nt'un pugno si cogghi,  
di la stragi chiancinu li figghi  
ancora luttu li poviri mogghi.  
O cimiteru vannu li famigghi  
pi li sò morti vasari li spogghi;  
pi st'assassini nna sintenza dura  
fatta all'istanti prima chi scura.

## LA RISPUNABILITÀ GUVIRNATIVA

Ministri chi lu Statu guvirnati  
rispusabilità quantu nn'aviti,  
a guvirnari c'è difficutati  
pi sti nimici chi nun canusciti  
chi stannu ntra nna manica nfilati  
contru la libirtà sunn'accaniti  
e vonnu chi la testa v'abbassati  
dura sintenza sunn'accunsititi.

Vui c'aviti firi un lu faciti,  
pi sarvari l'Italia luttati,  
s'aiu pizzicatu un v'affinniti,  
vali pi li barbari schirati.  
Camurra, latri, turruri e bantiti  
sunn' nna catina di urganizzati.  
Sanati di lu Stati sti firiti  
guai sarristamu ncatinati.

Ora lu discursu si cunchiuri  
tuccamu puru chist'altu latu:  
contru lu guvernu c'è rancuri  
dicinu ch'è latru e scilliratu;  
io dicu: semu tutti piccaturi  
è la natura chi nni cc'ia criatu;  
populu e guvernu, pi favuri,  
tutti sinceri sarvamu lu Statu.

## LI FERI DINTRA LA TUNNARA

Nta la tunnara traseru li ferì,  
ammazzanu tunni li megghiu chi cc'è,  
certu chi la matrici sù straneri  
la manuzza ch'è di dintra, ma cu è...  
asistinu li cuvi ogni quarteri  
li russi bricati e nivuri viré;  
mi pari chi ntò munnu tuttu nteri  
ci sunnu turrurista dunnì e gghiè.

## SCENZA E NAZIONI

Scenza e nazioni di stu munnu  
annu criatu stu murtali dannu,  
micidiali armi chi ci sunnu  
missili atomichi nn'aria vannu;  
urdigni nta lu mari ncapu e nfunnu  
e bummi e niutroni ancora fannu  
mentri niguziati giranu ntunnu  
armi di guerra p'avanzari vannu.

Chi danni, chi ruvini, chi subbissu  
quantu sangu nnuccenti nterra sparsu!,  
ad ogni parti è tuttu lu stessu  
sgridda lu sangu e prestu v`a a ll'ammassu.  
Li nazioni nun trovanu versu  
pi mettiri fini a stu fracassu,  
pruvviri Diu, tu di l'Universu,  
nun divintari stu munnu scuncassu.

Arrassu manna sti murtali rissi,  
tutti li cosi chi nun sunnu ammessi,  
li scenziati fannu sempri bissi,  
scenza murtali pi niatri stessi.  
Punisci Diu tu cu sunnu chissi,  
a cui scuvannu va sti cosi avversi  
li popoli pirfunna nta l'abissi,  
sarvani Diu, nni viremu persi.

Ntiriessi sù pi tutti, cu ci criri,  
e la giustizia forti vuciari,  
paci e libirtà vulemu aviri  
e nò la vita umana massacrari.  
Tutta l'umanità l'avissi a diri  
di subito la guerra scunciurari,  
li criminali fari mpauriri  
e cu rabbia di popolu stangari.